



**Uunga siunnersuut: Nukissamik pilersuineq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq. (Innaallagiamik aamma ungasianiik pilersuineq pillugu sullissinissamut isumaqatigiissuteqarneq)**  
(Inuussutissarsiornermut Nukissiuuteqarnermut Ilisimatusarnermullu Naalakkersuisoq)

Partii Naleraq sinnerlugu naatsumik siunnersuut oqaasertalerniarparput.

Nukissamik pilersuinermit allannguummut siunnersuut, imminerminik ajorpalunngitsoq inuiaqatigiinnut oqaimaqatigiissumik nammannissatsinnik tunngavissalersuivoq.

Kisianni, Kisianni.

Immikkoortoq 153 siullermeeqqammivarput, tassaniilu ernuamassutivut arlaqartut saqqummiuppavut. Maanna taanna ernumassut, naak teknikkitalerujussuugaluartoq, ersarissarneqaqqippoq.

Partii Naleqqami nunatsinni ineriartortitsinissarput pingaartipparput. Nunap inui aallaavigalugit, ineriartornermut peqataatissinnaallugit.

Taamaammat ujartorsimavarput imminut akilersinnaasunnornissaa erngup nukinganik nunatta pilersorneqarnissaa, aamma atuisunut malunnaatilimmik. Tassami oliamik kiassaataarsenneqassappat, erngup nukinganut pilersornermik taarserluni, atuisoq 100.000kr pallillugu akiliinissaa naatsorsuutigineqartariaqarpoq. Taamaasinerminilu akikinnerusumik ullumikkut kiassarneqalissanani, erngup nukingata kiassarnermut akiata olia assingalugu inisseqqagami.

Taamaammat atuisunut kaammattuutaassappat imminut akilersinnaassuseq qulakkeerniarlugu, orniginarsartariaqarparput erngup nukinganik pilersorneqarneq. Taamaasiunngikkutta nikittoqarnavianninnami atuisut suliffiillu akornanni.

Uani siunnersuummi ajuusaarnarpoq qitiusumiit aqunneqarusuppalluttoq namminersortut privatillu akikinnerusumik, ataavartumik mingutsitsinngitsumik imminnut pilersorneqarsinnaanerat. Tamanna killilersorneqartariaqanngitsutut Partii Naleqqamiit taakkartorusupparput.

Akerlianik inatsisit tunngaviusut qiviarnaqartariaqarnerat piffissanngorsoraarput. Ilarilluinnarsinnaavaat sumi tamaginni atueruttulernermit 100 %-imik naammattumik sillimmateqarnissamik pisussaaffeqarneq.

Suut ajoqutissaappat innuttaasut imminut pilersornerulerpata? Solcelle assigisaallu akikilliartronerat nalunaarutigineqareertoq nalunngilarput, immaqa Nukissiorfiit erngup nukinganik nukissiorfiit brintimik sanatissinnaaruttoraat, allanilluunniit nukeq atorluarsinnaaruttoraat.



partii naleraq

Nuuk 3. Oktober 2019  
UKA2019/151  
Pele Broberg Partii Naleraq

Ernumassutip tunngavia taamatut paasisinnaagaluarlugu, aamma oqarluartariaqarpugut taamaasigaangatta qulakkeertaratsigu ineriartunnginneq. Akikinnermik ujartuinnginneq. Innuttaasunut pitsaanerpaamik, kisanni aamma akikinnermik ujartuinnginneq.

Suliffeqarfik ippassaq immikkoortoq 153-imut atatillugu paasivarput imminut akilersinnaanngissusilimmik sanaartorsinnaasoq, maannalu uani siummersuummi innuttaasut, atuisut, akikinnermik pilersorsinnaanerat pinngitsoorlulugulusooq qulakkeerusukkaat.

Partii Naleqqamiit siunnersuut politikkikkut isummerfigivarput taamatut oqaasertalerlugu, imarisaalu teknikkitalerujuummat nagaassutitalerlugu ataatsimiititaliami sukumiisumik suliassanngorlugu ingerlateqqillugu.

qujanaq